

Na osnovu člana IV.4.a) Ustava BiH, Parlamentarna skupština Bosne i Hercegovine na 28. sjednici Predstavničkog doma, održanoj 22. januara 2004. godine, i na 17. sjednici Doma naroda, održanoj 28. januara 2004. godine, usvojila je

ZAKON

O IZMJENAMA I DOPUNAMA IZBORNOG ZAKONA BOSNE I HERCEGOVINE

Član 1.

U Izbornom zakonu Bosne i Hercegovine ("Službeni glasnik BiH", br. 23/01,7/02,9/02,20/02 i 25/02) u članu 1.8. iza stava 1. dodaju se st. 2. i 3. koji glase:

"Ako delegat u Domu naroda Parlamentarne skupštine Bosne i Hercegovine istovremeno ima mandat člana Predstavničkog doma Parlamentarne skupštine Bosne i Hercegovine, Parlamenta Federacije Bosne i Hercegovine, Narodne skupštine Republike Srpske ili kantonalne skupštine, dužan je u roku od 3 dana u pisanom obliku obavijestiti Izbornu komisiju BiH za koji se mandat odlučio, čime mu drugi mandati koje ima prestaju.

Ako delegat u Domu naroda Parlamentarne skupštine Bosne i Hercegovine stekne pravo na mandat u Predstavničkom domu Parlamentarne skupštine Bosne i Hercegovine, Predstavničkom domu Parlamenta Federacije Bosne i Hercegovine, Narodnoj skupštini Republike Srpske ili kantonalnoj skupštini u skladu s članom 9.11. ovog zakona, a u pisanom obliku u roku od 3 dana ne obavijesti Izbornu komisiju o odricanju tog prava, mandat mu neće biti dodijeljen, već će biti dodijeljen sljedećem kvalificiranom kandidatu s liste iste izborne jedinice u skladu sa stavom 2. člana 9.99. ovog zakona. Ako se nakon upita Izborne komisije delegat odluči za korištenje tog prava, prestaje mu mandat delegata u Domu naroda Parlamentarne skupštine BiH."

Dosadašnji st. 2., 3. i 4. postaju st. 4., 5. i 6.

Član 2.

U članu 2.5. u stavu 2. iza riječi "članovi" riječi: "Komisije za imenovanje sudija Suda Bosne i Hercegovine i članovi Izborne komisije Bosne i Hercegovine (pod zajedničkim nazivom: Komisija za izbor i imenovanje)" zamjenjuju se riječima: "Ad hoc komisija za izbor i imenovanje".

Iza stava 2. dodaje se stav 3. koji glasi: "Ad hoc komisija za izbor i imenovanje ima sedam članova od kojih dva imenuje predsjednik Visokog sudskog i tužilačkog vijeća iz reda članova Vijeća, tri imenuje Administrativna komisija Predstavničkog doma Parlamentarne skupštine Bosne i Hercegovine iz reda članova Komisije i dva imenuje predsjednik Izborne komisije Bosne i Hercegovine iz reda članova Izborne komisije Bosne i Hercegovine."

Iza stava 3. dodaje se stav 4. koji glasi: "U Ad hoc komisiji za izbor i imenovanje moraju biti zastupljeni konstitutivni narodi, dva Bošnjaka, dva Srbina i dva Hrvata i jedan iz reda ostalih." Dosadašnji st. 3., 4. i 5. postaju 5., 6. i 7.

Dosadašnji st. 4., 5. i 6. postaju st. 5., 6. i 7.

U novim st. 5. i 7. riječi: "Komisija za izbor i imenovanje" zamjenjuju se riječima: "Ad hoc komisija za izbor i imenovanje".

Član 3.

U članu 19.1. u stavu 2. iza riječi: "Komisije za imenovanje sudija Suda Bosne i Hercegovine i međunarodni članovi Izborne komisije Bosne i Hercegovine (pod zajedničkim nazivom: Privremena komisija za imenovanje)" zamjenjuju se riječima: "Ad hoc komisija za izbor i imenovanje".

U stavu 3. riječi: "Privremena komisija za imenovanje" zamjenjuju se riječima: "Ad hoc komisija za izbor i imenovanje".

U istom stavu riječi: "Koji koristi Komisija za imenovanje sudija Suda Bosne i Hercegovine, u dijelu i u mjeri u kojoj je primjenjiv" zamjenjuju se riječima: "koji je usvojila Izborna komisija Bosne i Hercegovine u skladu s članom 2.5. stav 2. ovog zakona."

Član 4.

Ovaj zakon stupa na snagu osmog dana od dana objavljivanja u "Službenom glasniku BiH", službenim glasilima entiteta i "Službenom glasniku Brčko Distrikta", a primjenjivat će se i na poslanike izabrane na Općim izborima 5.oktobra 2002. godine.

PS BiH broj 4/04
28. januara 2004.godine
Sarajevo

Predsjedavajući
Predstavničkog doma
dr. **Nikola Špirić**, s. r.

Predsjedavajući
Doma naroda
Mustafa Pamuk, s. r.